



MUSICA

JANE WALTON: ABSTRACT, ABSTRUS, GENIAL

da H.

Puspè ina giada è la villa Babilonia (guarda Punts nr. 176) stada la locaziun che ha ospità ina band che na vegn mai ad emplenir in Hallenstadion a Turitg.

La sala era vida. Sulettamain ils instruments han fatg bella parada avant la paraid surtratga cun aluminium uschia ch'ins pudeva guardar ses agen purtret. Per terra han els mess ora strom. Ina giagina da plastic, pitgada si avant il palc, guardava giu sin nus. Ina mascra, accessori per gieus sexuals, era pitgada sur il keyboard ch'ins pudeva pigliar tema. La sala ha entschet a s'emplenir. Ils musicists èn vegnids sin il palc. N'era quai betg il tip che era sper mai cura che jau hai pustà mia gervosa? El era. Pee Walton, responsabel per «howls, screams and others», uschia descrit sin la homepage. Pee Walton, tratg en sco in actur dal film A Clockworth Orange. Insumma tut ils 6 musicists eran tratgs en a moda abstrusa, curiusa. La posaunista, 1.80 meter gronda, vestgida cun ina rassa da purs cotschna, or da la quala ses sains n'èn – be pervia da ses BH cun puncts da panter – betg sa preschentads a la massa. Il battarist veva si in chapè da pur, ina chautscha da tgirom. I ma pareva che il «Ueli der Knecht» saja davant mai. «Berlin's favorite drinking polka band.» Quai lur slogan.

«Ech chönt perfekt schwiizerdütsch reda, tuens aber ned wel mini band mi denn ned

verstoh wür.» Ils emprims plets da Pee avant ch'el ha cumenzà a far quai ch'el sa: howls, screams and others. Maschadà cun batteria, bass, gitarra electrica, posauna ed orgelet da man ha quai tunà sco il onns '50 e tuttina betg uschia. Igl era plitost ina maschaida da ska, musica da circus, country. Speed-rumpel-polka-country-trash-circus-punk-ska-musique. Gea, precis uschia pon ins definir quel stil da musica. Jane Walton, en ils onns '50 ina actura da classa B en ils Stadis Unids, è il grond idol per ils Tudestgs. Morta è Jane pervia dad in grev accident. La saira è stada sin ir frontalmain vers in grev accident e na vuleva mai chalar. Suenter in'ura suaditsch dumonda Pee: «Noch eins vor der Pause?» La resposta è stà in lung e dad aut «Jawohl». In'ura pli tard, la pausa betg anc fatga, Marika Walton, la dunna cun ils sains en il BH da panter, vegn cotschna en fatscha. Cun la posauna en bucca na vul ella betg chalar da sunar, ses venter sa scufla sco ina culla, pronta per explodir. E lura il finalissimo. La band dat tut. Uss era tut l'armonia or da la chanzun, mo pli plirrs, plengs, aaahs e sbrüs nundefinibels. Pee piglia chatsch. In davos sigl en l'aria, in davos ah e a fin è la festa da folclora.



H. aka Adrian Stecher (23) è student da las ciencias da medias e communicaziun a Friburg. Il plaschair per la musica al ha gia tschiffà d'uffant. Il bab è organist e la mamma sunava excellentamain la flauta, uschia ch'el ha sunà sur blers onns il triangul. Per el è musica insatge che unescha, perquai na pudess el betg imaginar ina vita senza musica. Per las PUNTS va el a la tschertga da novas bands naziunalas ed internaziunalas e rapporta da concerts, albums ed experientschas fatgas cun la musica. Per il Radio Rumantsch moderescha Adrian tranter auter mintga segunda sonda la parada da hits.